

佛陀的一生（中）

釋開仁·2010/10/15

柒、梵天勸請轉法輪

一、《增壹阿含·1經》卷10〈19勸請品〉：

爾時，世尊得道未久，便生是念：「我今甚深之法，難曉難了，難可覺知，不可思惟，休息微妙，智者所覺知，能分別義理，習之不厭，即得歡喜。設吾與人說妙法者，人不信受，亦不奉行，唐有其勞，則有所損。我今宜可默然¹，何須說法！」

時，梵天在梵天上，遙知如來所念，猶如士夫屈伸臂頃，從梵天上沒不現，來至世尊所，頭面禮足，在一面住。

爾時，梵天白世尊曰：「此閻浮提必當壞敗，三界喪目。如來、至真、等正覺出現於世，應演法寶，然今復不暢演法味，唯願如來普為眾生廣說深法！

又此眾生根原易度，若不聞者，永失法眼。此應為法之遺子，猶如優鉢蓮華、拘牟頭華、分陀利華，雖出於地，未出水上，亦未開敷。

是時，彼華漸漸欲生，故未出水。

或時此華以出水上，或時此華不為水所著。

此眾生類亦復如是，為生、老、病、死所見逼促，諸根應熟，然不聞法而便喪者，不亦苦哉！今正是時，唯願世尊當為說法！」

爾時，世尊知梵天心中所念，又慈愍一切眾生故，說此偈曰：

「梵天今來勸，如來開法門；聞者得篤信，分別深法要。

猶在高山頂，普觀眾生類；我今有此法，昇堂現法眼。」

爾時，梵天便作是念：「如來必為眾生說深妙法」。歡喜踊躍，不能自勝。頭面禮足已，即還天上。²

二、《四分律》卷31、卷32：

（一）佛於五七中，常遊解脫三昧，以法自娛

爾時，世尊食賈人麩蜜已，即於樹下結加趺坐七日不動，遊解脫三昧而自娛樂。七日已從三昧起，…去彼不遠有呵梨勒樹，彼樹神篤信於佛，即取呵梨勒果來奉世尊。…

爾時，世尊食呵梨勒果已，於樹下結加趺坐七日思惟不動，遊解脫三昧而自娛樂。七日後從三昧起，到時著衣持鉢，入鬱鞞羅村乞食，漸至鬱鞞羅村婆羅門舍中庭默然而

¹ 默然：沉默不語貌。（《漢語大詞典（十二）》，p.1342）

² (CBETA, T02, no. 125, p. 593, a24-b23)

住，婆羅門見世尊默然住，發歡喜心，即出食施與世尊。…

時世尊受此婆羅門食已，更詣一離婆那樹下，七日中結加趺坐思惟不動，遊解脫三昧而自娛樂。時世尊七日後從三昧起，到時著衣持鉢，入鬱鞞羅村乞食。…時彼婆羅門婦，是蘇闍羅大將女…見已發歡喜心即出食施與世尊。…

爾時世尊食彼食已，即還詣離婆那樹下，七日結加趺坐思惟不動，遊解脫三昧而自娛樂。時世尊七日後，到時著衣持鉢入鬱鞞羅村乞食。…時鬱鞞羅婆羅門男女…即出食施如來。…

時世尊食彼食已，即詣文驎樹文驎水文驎龍王宮，到彼已結加趺坐七日思惟不動，遊解脫三昧而自娛樂。爾時七日天大雨極寒，文驎龍王自出其宮，以身遶佛頭蔭佛上，而白佛言：「不寒不熱耶？不為風飄日曝，不為蚊虻所觸燒耶？」爾時七日後雨止清明，時龍王已見雨止清明，還解身不復遶佛，即化作一年少婆羅門，在如來前，合掌胡跪，禮如來足…。

(二) 釋尊感到正法的深奧，眾生的愛著，而默然不說法

爾時世尊遊文驎龍王樹下住已，便往詣阿踰波羅尼拘律樹下，到已敷坐具結加趺坐，作是念言：「我今已獲此法，甚深難解難知，永寂休息，微妙最上，智者能知，非愚者所習。眾生異見、異忍、異欲、異命，依於異見樂於櫟窟，眾生以是樂於櫟窟故，於緣起法甚深難解；復有甚深難解處，滅諸欲愛盡涅槃，是處亦難見故，我今欲說法，餘人不知，則於我唐勞疲苦耳。」…。³

(三) 梵天知佛心念已，即下人間殷勤的請佛說法

爾時，世尊作是思惟已，默然而不說法。

時梵天王於梵天上，遙知如來心中所念已，念世間大敗壞，如來今日獲此妙法，云何默然而住，令世間不聞耶？爾時，梵天如力士屈申臂頃，從彼而來到如來前，頭面禮已在一面立，白世尊言：「唯願如來說法，唯願善逝說法，世間眾生，亦有垢薄智慧聰明易度者，能滅不善法成就善法。」

爾時，世尊告梵天王：「如是，如是，梵王！如汝所言。」我向者在閑靜處而生此念言：「我今已獲此法，此法甚深難知難解。…是故梵天，我默然而不說法。」

爾時，梵天復白佛言：「世間大敗壞，今如來獲此正法，云何默然不說，令世間不聞耶？唯願世尊，時演正法，流布於世，世間亦有垢薄聰明眾生易度者，能滅不善法，成就善法…。」

爾時，世尊受梵天勸請已，即以佛眼⁴觀察世間眾生，世間生世間長，有少垢有多

³ (CBETA, T22, no. 1428, p. 785, c28-p. 786, c11)

⁴ 《大智度論》卷33〈1 序品〉：「

【經】復次，舍利弗！菩薩摩訶薩欲得五眼者，當學般若波羅蜜！

【論】何等五？肉眼、天眼、慧眼、法眼、佛眼。

(1) 肉眼，見近不見遠，見前不見後，見外不見內，見晝不見夜，見上不見下；以此礙故，求天眼。

(2) 得是天眼，遠近皆見，前後、內外，晝夜、上下，悉皆無礙。是天眼見和合因緣生假名之

垢，利根鈍根，有易度有難度，畏後世罪，能滅不善法，成就善法。…

爾時，梵天知世尊受勸請已，禮世尊足，右遶三匝而去，即沒不現。⁵

三、《雜阿含·1189經》卷44：

※有一乘道，能淨眾生，謂四念處

一時，佛住鬱毘羅聚落尼連禪河側菩提樹下，成佛未久。

爾時，世尊獨靜思惟，作是念：「有一乘道，能淨眾生，度諸憂悲，滅除苦惱，得真如法，謂四念處。何等為四？身身觀念處；受；心；法法觀念處。

若有人不樂四念處者，則不樂如聖法；不樂如聖法者，則不樂如聖道；不樂如聖道者，則不樂甘露法；不樂甘露法者，則不解脫生老病死、憂悲惱苦。

若樂修四念處者，則樂修如聖法；樂修如聖法者，則樂如聖道；樂如聖道者，則樂甘露法；樂甘露法者，得解脫生老病死、憂悲惱苦。」

爾時，娑婆世界主——梵天王，知佛心念已，譬如力士屈伸臂頃，於梵天沒，住於佛前，作是歎言：「如是，世尊！如是，善逝！有一乘道，能淨眾生，謂四念處，乃至解脫生老病死、憂悲惱苦。」

時，梵天王復說偈言：

「謂有一乘道，見生諸有邊，演說於正法，安慰苦眾生。

過去諸世尊，以乘斯道度；當來諸世尊，亦乘度斯道；現在尊正覺，乘此度海流，究竟生死際，調伏心清淨。

於生死輪轉，悉已永消盡，知種種諸界，慧眼顯正道。

譬若恆水流，悉歸趣大海，激流浚漂遠；正道亦如是，廣智善顯示，逮得甘露法。

殊勝正法輪，本所未曾聞，哀愍眾生故，而為眾生轉。

覆護天人眾，令度有彼岸，是故諸眾生，鹹皆稽首禮。」

爾時，梵天王聞佛所說，歡喜隨喜，稽首佛足，即沒不現。⁶

物，不見實相，所謂空、無相、無作，無生、無滅，如前，中、後亦爾；為實相故，求慧眼。

(3)得慧眼，不見眾生，盡滅一異相，捨離諸著，不受一切法，智慧自內滅，是名慧眼。但慧眼不能度眾生！所以者何？無所分別故，以是故求法眼。

(4)法眼令是人行是法，得是道，知一切眾生各各方便門，令得道證。法眼不能遍知度眾生方便道，以是故求佛眼。

(5)佛眼無事不知，覆障雖密，無不見知；於餘人極遠，於佛至近；於餘幽闇，於佛顯明；於餘為疑，於佛決定；於餘微細，於佛為麤；於餘甚深，於佛甚淺。是佛眼，無事不聞，無事不見，無事不知，無事為難，無所思惟，一切法中，佛眼常照。」(CBETA, T25, no. 1509, p. 305, c17-p. 306, a7)

⁵ (CBETA, T22, no. 1428, p. 786, c20-p. 787, b6)

⁶ (CBETA, T02, no. 99, p. 322, a28-c3)

四、《大智度論》卷7〈1 序品〉：

（一）諸佛必應說法度眾，何須勸請；又未見十方無量諸佛，云何可請

問曰：諸佛之法，法應說法廣度眾生，請與不請法自應爾，何以須請？若於自前面請諸佛則可，今十方無量佛土諸佛亦不自見，云何可請？

答曰：

1、諸佛雖不待人請，請者亦能得福

諸佛雖必應說法，不待人請，請者亦應得福。

如大國王雖多美饌，有人請者必得恩福，錄⁷其心故；

又如慈心念諸眾生令得快樂，眾生雖無所得，念者大得其福。

請佛說法，亦復如是。

2、有佛若無人請者，便入涅槃而不說法

復次，有諸佛無人請者，便入涅槃而不說法。

如《法華經》⁸中多寶世尊，無人請故便入涅槃，後化佛身及七寶塔，證說《法華經》故，一時出現。

亦如須扇多佛，弟子本行未熟，便捨入涅槃，留化佛一劫以度眾生。

今是釋迦文尼佛，得道後五十七日寂不說法，⁹自言：「我法甚深，難解難知！一切眾生縛著世法，無能解者；不如默然入涅槃樂。」是時，諸菩薩及釋提桓因、梵天王諸天合掌敬禮，請佛為諸眾生初轉法輪。佛時默然受請，後到波羅奈鹿林中轉法輪。

如是，云何言請無所益？

3、雖眾生不面請佛，佛常見其心亦聞彼請；假令諸佛不聞不見，請佛亦有福德

復次，佛法等觀眾生，無貴無賤，無輕無重；有人請者，為其請故便為說法。雖眾生不面請佛，佛常見其心亦聞彼請；假令諸佛不聞不見，請佛亦有福德，何況佛悉聞見而無所益？

（二）何故正以二事勸請

問曰：既知請佛有益，何以正以二事請？

⁷ 錄：採取，採用。（《漢語大詞典（十一）》，p.1342）

⁸ 參見《妙法蓮華經》卷4（大正9，32b-34b）。

⁹（1）《阿毘達磨大毘婆沙論》卷182：「有說：彼時二人善根未熟，未堪聞法。所以者何？佛成道已，彼初一人若更經五十七日有餘命者應堪聞法。有說：五十六日。有說：四十九日。彼第二人若更經五十一日有餘命者應堪聞法。……由此非佛教化失時，世尊或時留自壽行待所化者，如待蘇跋達羅等，若能留他壽行無有是處。」（CBETA, T27, no. 1545, p. 914, a13-20）

（2）法寶撰《俱舍論疏》卷1：「若謂《婆沙》見聞不同，成道之後即觀機根，因何《婆沙》次下文云：彼初一人，佛成道後，若更五十七日有餘命者應堪聞法。此即佛成道後，至觀根時五十七日，與《智論》同。又《智論》第一云：爾時菩薩捨苦行處，到菩提樹下，坐金剛座降魔眾已，即得阿耨菩提。時梵天王等皆詣佛所，勸請世尊初轉法輪，准此論文。」（CBETA, T41, no. 1822, p. 455, b2-9）

答曰：

1、有人謂佛貪壽、愛著於法，為除眾疑故須請

餘不須請，此二事要必須請；若不請而說，有外道輩言：「體道常定，何以著法，多言多事？」以是故，須請而說。

若有人言：「若知諸法相，不應貪壽，久住世間而不早入涅槃。」以是故須請。

若不請而說，人當謂佛愛著於法；欲令人知，以是故，要待人請而轉法輪。

諸外道輩自著於法，若請、若不請而自為人說；佛於諸法不著不愛，為憐愍眾生故，有請佛說者佛便為說，諸佛不以無請而初轉法輪。如偈說：

「諸佛說何實？何者是不實？實之與不實，二事不可得。¹⁰

如是真實相，不戲於諸法。憐愍眾生故，方便轉法輪。¹¹」

2、佛為斷老、病、死，不答十四難故

復次，佛若無請而自說法者，是為自顯自執法，應必答十四難。¹²今諸天請佛說法，但為斷老病死無戲論處，是故不答十四難無咎。以是因緣故，須請而轉法輪。

3、若佛不請而說，外道所譏；梵天自請，則外道心伏

復次，佛在人中生，用大人法故，雖有大悲，不請不說；若不請而說，外道所譏。以是故，初要須請。又復外道宗事梵天，梵天自請，則外道心伏。……¹³

捌、往化五比丘

一、《中阿含·204 羅摩經》卷 56〈3 晡利多品〉：

(一) 世尊初成道時，欲為阿羅羅及鬱陀羅說法，然二者皆已命終生天

我初覺無上正盡覺已，便作是念：「我當為誰先說法耶？」我復作是念：「我今寧可為阿羅羅伽摩先說法耶？」爾時有天，住虛空中，而語我曰：「大仙人！當知阿羅羅伽摩彼命終來至今七日。」我亦自知伽摩其命終來得今七日。我復作是念：「阿羅羅伽摩，

¹⁰ 《中論》卷 3〈觀法品第 18〉：「一切實非實，亦實亦非實，非實非非實，是名諸佛法。」(大正 30, 24a5-6)

¹¹ 《中論》卷 4〈觀邪見品第 27〉：「瞿曇大聖主，憐愍說是法，悉斷一切見，我今稽首禮。」(大正 30, 39b25-26)

¹² 十四難，又稱十四無記，參見《雜阿含·962 經》卷 34：

佛告婆蹉種出家：「若作是見：(1) 世間常，此則真實，餘則虛妄者，此是倒見，此是觀察見，此是動搖見，此是垢污見，此是結見，是苦、是閻、是惱、是熱，見結所繫。愚癡無聞凡夫，於未來世，生老病死、憂悲惱苦生。婆蹉種出家！若作是見：(2) 世間無常，(3) 常無常，(4) 非常非無常；(5) 有邊，(6) 無邊，(7) 邊無邊，(8) 非有邊非無邊，(9) 是命是身，(10) 命異身異；(11) 如來有後死，(12) 無後死，(13) 有無後死，(14) 非有非無後死——此是倒見，乃至憂悲惱苦生。」(大正 2, 245c10-19)

¹³ (CBETA, T25, no. 1509, p. 109, b14-p. 110, a2)

彼人長衰不聞此法，若聞此者，速知法次法。」

我初覺無上正盡覺已，作如是念：「我當為誰先說法耶？」我復作是念：「我今寧可為鬱陀羅羅摩子先說法耶？」天復住空，而語我曰：「大仙人！當知鬱陀羅羅摩子命終已來二七日也。」我亦自知鬱陀羅羅摩子命終已來二七日也。我復作是念：「鬱陀羅羅摩子，彼人長衰不聞此法，若聞法者，速知法次法。」

（二）世尊欲前往鹿野園，為五比丘說法

1、途中先遇異學優陀

我初覺無上正盡覺已，作如是念：「我當為誰先說法耶？」我復作是念：「昔五比丘為我執勞，多所饒益，我苦行時，彼五比丘承事於我，我今寧可為五比丘先說法耶？」我復作是念：「昔五比丘今在何處？」我以清淨天眼出過於人，見五比丘在波羅[木奈]仙人住處鹿野園中。我隨住覺樹下，攝衣持鉢，往波羅[木奈]加尸都邑。

爾時，異學優陀¹⁴遙見我來，而語我曰：「賢者瞿曇！諸根清淨，形色極妙，面光照耀。賢者瞿曇！師為是誰？從誰學道？為信誰法？」

我於爾時即為優陀說偈答曰：「我最上最勝，不著一切法；諸愛盡解脫，自覺誰稱師？無等無有勝，自覺無上覺；如來天人師，普知成就力。」

優陀問我曰：「賢者瞿曇！自稱勝耶？」

我復以偈而答彼曰：「勝者如是有，謂得諸漏盡；我害諸惡法，優陀故我勝。」

優陀復問我曰：「賢者瞿曇！欲至何處？」

我時以偈而答彼曰：「我至波羅[木奈]，擊妙甘露鼓；轉無上法輪，世所未曾轉。」

優陀語我曰：「賢者瞿曇！或可有是。」如是語已，即彼邪道徑便還去。

2、五比丘被佛的極妙威德所攝受

我自往至仙人住處鹿野園中。時，五比丘遙見我來，各相約敕而立制曰：「諸賢！當知此沙門瞿曇來，多欲多求，食妙飲食，好粳糧飯，及麩酥蜜，麻油塗體，今復來至，汝等但坐，慎莫起迎，亦莫作禮，豫留一座，莫請令坐。到已語曰：『卿！欲坐者，自隨所欲。』」

我時往至五比丘所，時，五比丘於我不堪極妙威德，即從座起，有持衣鉢者，有敷床者，有取水者，欲洗足者。我作是念：「此愚癡人！何無牢固，自立制度還違本要？」我知彼已，坐五比丘所敷之座。

時，五比丘呼我姓字，及卿於我，我語彼曰：「五比丘！我如來、無所著、正盡覺，汝等莫稱我本姓字，亦莫卿我。所以者何？我求無病無上安隱涅槃，得無病無上安隱涅槃；我求無老、無死、無愁憂感、無穢汙無上安隱涅槃，得無老、無死、無愁憂感、無穢汙無上安隱涅槃。生知生見，定道品法，生已盡，梵行已立，所作已辦，不更受有，知如真。」

彼語我曰：「卿瞿曇！本如是行，如是道跡，如是苦行，尚不能得人上法差降聖知聖見，況復今日多欲多求，食妙飲食，好粳糧飯，及麩酥蜜，麻油塗體耶？」

¹⁴ 優陀~Upaka. (大正1, 777d, n.7)。

我復語曰：「五比丘！汝等本時見我如是諸根清淨，光明照耀耶？」

時，五比丘復答我曰：「本不見卿諸根清淨，光明照耀。卿瞿曇！今諸根清淨，形色極妙，面光照耀。」

3、佛告五比丘捨離二邊行中道

我於爾時 告彼曰：「五比丘！當知有二邊行，諸為道者所不當學。一曰，著欲樂下賤業凡人所行；二曰，自煩自苦，非賢聖法，無義相應。五比丘！捨此二邊，有取中道，成明成智，成就於定，而得自在，趣智趣覺，趣於涅槃，謂入正道，正見……乃至正定，是謂為入。」¹⁵

二、《雜阿含·101經》卷4：

※唯佛足具千幅輪相，及究竟生死邊際

如是我聞：一時，佛在拘薩羅人間遊行，有徙迦帝聚落、墮鳩羅聚落二村中間，一樹下坐，入晝正受。

時有豆磨種姓婆羅門，隨彼道行，尋佛後來。見佛腳跡，千幅輪相，印文顯現，齊輻圓轉，眾好滿足。見已作是念：「我未曾見人間有如是足跡，今當隨跡以求其人。」即尋腳跡至於佛所，來見世尊坐一樹下，入晝正受。嚴容絕世，諸根澄靜，其心寂定，第一調伏，止觀成就，光相巍巍，猶若金山。見已白言：「為是天耶？」

佛告婆羅門：「我非天也。」

〔*婆羅門白佛：〕「為龍、夜叉、乾闥婆、阿修羅、迦樓羅、緊那羅、摩睺羅伽、人非人等？」

佛告婆羅門：「我非龍乃至人非人也。」

婆羅門白佛：「若言非天、非龍，乃至非人、非非人，為是何等？」

爾時、世尊說偈答言：「天、龍、乾闥婆，緊那羅、夜叉，無善阿修羅，諸摩睺羅伽，人與非人等，悉由煩惱生。如是煩惱漏，一切我已捨，已破已磨滅，如芬陀利生，雖生於水中，而未曾著水；我雖生世間，不為世間著。歷劫常選擇，純苦無暫樂，一切有為行，悉皆生滅故。離垢不傾動，已拔諸劍刺，究竟生死際，故名為佛陀。」

佛說此經已，豆磨種婆羅門聞佛所說，歡喜隨喜，從路而去。¹⁶

玖、初轉法輪——三轉四諦十二行相

¹⁵ (CBETA, T01, no. 26, p. 777, a18-p. 778, a10)

¹⁶ (CBETA, T02, no. 99, p. 28, a20-b18)

一、《雜阿含·379經》卷15：

（一）初轉法輪——如實知、思惟四諦

世尊告五比丘：「此苦聖諦，本所未曾聞法，當正思惟時，生眼、智、明、覺。此苦集，此苦滅，此苦滅道跡聖諦，本所未曾聞法，當正思惟時，生眼、智、明、覺。

（二）二轉法輪——知苦、斷集、證滅、修道

復次、苦聖諦，知當復知，本所未聞法，當正思惟時，生眼、智、明、覺。

苦集聖諦，已知當斷，本所未曾聞法，當正思惟時，生眼、智、明、覺。

復次、此苦滅聖諦，已知當作證，本所未聞法，當正思惟時，生眼、智、明、覺。

復次、此苦滅道跡聖諦，已知當修，本所未曾聞法，當正思惟時，生眼、智、明、覺。

（三）三轉法輪——已知、已斷、已滅、已修

復次、比丘！此苦聖諦，已知已知出，所未聞法，當正思惟時，生眼、智、明、覺。

復次、此苦集聖諦，已知已斷出，所未聞法，當正思惟時，生眼、智、明、覺。

復次、苦滅聖諦，已知已作證出，所未聞法，當正思惟時，生眼、智、明、覺。

復次、苦滅道跡聖諦，已知已修出，所未曾聞法，當正思惟時，生眼、智、明、覺。

（四）世尊以自身的經驗為證明，來加強弟子們信解修行的決心

諸比丘！我於此四聖諦，三轉十二行，不生眼、智、明、覺者，我終不得於諸天、魔、梵，沙門、婆羅門，聞法眾中，為解脫，為出，為離，亦不自證得阿耨多羅三藐三菩提。

我已於四聖諦、三轉十二行，生眼、智、明、覺故，於諸天、魔、梵，沙門、婆羅門，聞法眾中，得出，得脫，自證得成阿耨多羅三藐三菩提。

（五）尊者憍陳如得法眼淨

爾時、世尊說是法時，尊者憍陳如，及八萬諸天，遠塵、離垢，得法眼淨。

爾時、世尊告尊者憍陳如：「知法未」？

憍陳如白佛：「已知，世尊」！

復告尊者憍陳如：「知法未」？

拘鄰白佛：「已知，善逝」！

尊者拘鄰已知法故，是故名阿若拘鄰。¹⁷

尊者阿若拘鄰知法已，地神舉聲唱言：「諸仁者！世尊於波羅奈國仙人住處鹿野苑

¹⁷（1）印順法師《雜阿含經論會編（上）》（p.71-72）：「憍陳如與拘鄰，同是 kaundinya 的音譯，在同一經的上下文中，怎能譯作憍陳如，又忽而譯作拘鄰呢？這是絕對不可能的！原來「拘鄰」是漢代古譯，一定是古代的抄寫者，將熟悉習用的拘鄰，代替憍陳如了。」

（2）阿若拘隣～Aññāta koṇḍañña.（大正2，104d，n.3）。阿若(aññāta)，表示已開悟的意思。（參見：水野弘元，《巴利語辭典》，p.8）

中，三轉十二行法輪，諸沙門、婆羅門，諸天、魔、梵所未曾轉；多所饒益，多所安樂，哀愍世間，以義饒益，利安天人，增益諸天眾，減損阿修羅眾」。

地神唱已，聞虛空神天，四天王天，三十三天，炎魔天，兜率陀天，化樂天，他化自在天，展轉傳唱，須臾之間，聞于梵身天。梵天乘聲唱言：「諸仁者！世尊於波羅奈國仙人住處鹿野苑中，三轉十二行法輪，諸沙門、婆羅門，諸天、魔、梵，及世間聞法未所曾轉；多所饒益，多所安樂，以義饒益，諸天世人，增益諸天眾，減損阿修羅眾。」世尊於波羅奈國仙人住處鹿野苑中轉法輪，是故此經名《轉法輪經》。¹⁸

二、《增壹阿含·5經》卷14〈24高幢品〉：

（一）初轉

世尊告五比丘：「汝等當知：有此四諦。云何為四？苦諦、苦集諦、苦盡諦、苦出要諦。

（二）二轉

◎彼云何名為苦諦？所謂生苦、老苦、病苦、死苦、憂悲惱苦、愁憂苦痛，不可稱記。

怨憎會苦、恩愛別苦、所欲不得，亦復是苦。取要言之，五盛陰苦，是謂苦諦。

◎云何苦集諦？所謂受愛之分，習之不倦，意常貪著，是謂苦習諦。

◎彼云何苦盡諦？能使彼愛滅盡無餘，亦不更生，是謂苦盡諦。

◎彼云何名為苦出要諦？所謂賢聖八品道。所謂等見、等治、等語、等業、等命、等方便、等念、等定。

是謂名為四諦之法。

（三）三轉

然復，五比丘！此四諦之法，

苦諦者，眼生、智生、明生、覺生、光生、慧生，本未聞法。復次，苦諦者，實、定，不虛不妄，終不有異；世尊之所說，故名為苦諦。

苦集諦者，本未聞法，眼生、智生、明生、覺生、光生、慧生。復次，苦集諦者，實、定，不虛不妄，終不有異；世尊之所說，故名為苦集諦。

苦盡諦者，本未聞法，眼生、智生、明生、覺生、慧生、光生。復次，苦盡諦者，實、定，不虛不妄，終不有異；世尊之所說，故名為苦盡諦。

苦出要諦者，本未聞法，眼生、智生、明生、覺生、光生、慧生。復次，苦出要諦者，實、定，不虛不妄，終不有異；世尊之所說，故名為苦出要諦。

五比丘當知：此四諦者，三轉十二行，如實不知者，則不成無上正真、等正覺。以我分別此四諦三轉十二行，如實知之，是故成無上至真、等正覺。¹⁹

¹⁸ (CBETA, T02, no. 99, p. 103, c14-p. 104, a28)

¹⁹ (CBETA, T02, no. 125, p. 619, a8-b6)

三、《增壹阿含·5經》卷14〈24高幢品〉：

爾時，世尊告五比丘：「汝等二人住受教誨，三人乞食；三人所得食者，六人當共食之。三人住受教誨，二人往乞食；二人所得食者，六人當取食之。」

爾時教誨，此時成無生涅槃法，亦成無生、無病、無老、無死。是時，五比丘盡成阿羅漢。是時，三千大千剎土有五阿羅漢，佛為第六。²⁰

四、《阿毘達磨大毘婆沙論》卷79：

如《契經》說：「佛告苾芻：

『此苦聖諦我昔未聞，於此法中如理作意，由此便生眼、智、明、覺；

此苦聖諦慧應遍知，我昔未聞，乃至廣說；

此苦聖諦慧已遍知，我昔未聞，乃至廣說。

集、滅、道諦廣說亦爾。』²¹

此苦聖諦我昔未聞等，顯未知當知根；

此苦聖諦慧應遍知等，顯已知根；

此苦聖諦慧已遍知等，顯具知根。

集、滅、道諦各顯三根，應知亦爾。²²

大德法救作如是說：「我思此經，舉身毛豎，以佛所說必不違義，定有次第。今此《契經》越次第說具知根後，復說未知當知根故，非佛、獨覺及諸聲聞得有如觀行次第。具知根後，如何復起初無漏根？若捨此經，必不應理，佛初說故，以五苾芻而為上首[並]八萬諸天聞此所說皆證法故；若欲不捨，復違次第。故思此經，舉身毛豎。」然後大德雖作是言而不捨經，但迴²³文句。彼作是說：「此經應言：

◎『此苦聖諦我昔未聞，乃至廣說。集、滅、道諦廣說亦爾。』

◎『此苦聖諦慧應遍知；此集聖諦慧應永斷；此滅聖諦慧應作證；此道聖諦慧應修習。昔未聞等，廣說如前。』

◎『此苦聖諦慧已遍知；此集聖諦慧已永斷；此滅聖諦慧已作證；此道聖諦慧已修

²⁰ (CBETA, T02, no. 125, p. 619, b19-26)

²¹ 參見 S. 56. 11—12. Tathāgatenavuttā, Vol. V, pp. 424-425. 另外，與《雜阿含·379經》卷15(大正2, 103c)對應者還有《增壹阿含·5經》卷13〈24高幢品〉(大正2, 619a)等亦談到三轉法輪之次第，然所說與法救之主張一致。

²² (1)《大智度論》卷23〈1序品〉：「【經】三根：未知欲知根，知根，知己根。【論】未知欲知根者，無漏九根和合，信行、法行人，於見諦道中名未知欲知根，所謂信等五根，喜、樂、捨根，意根。信解、見得人，思惟道中，是九根轉名知根。無學道中，是九根名知己根。」(CBETA, T25, no. 1509, p. 234, b26-c1)

(2)《大智度論》卷44〈12句義品〉：「三無漏根：未知欲知根、知根、知己根。」(CBETA, T25, no. 1509, p. 381, b3-4)

²³ 迴：1、掉轉；返回。2、旋轉；翻轉。(《漢語大詞典(十)》，p.769)

習。昔未聞等，廣說如前。』
若作是說，不失次第，隨順現觀，非如經說。

阿毘達磨諸論師言：「不應輒²⁴迴此經文句。過去無量諸大論師，利根多聞過於大德，尚不敢迴此經文句，況今大德而可輒迴！但應尋求此經意趣。謂說法者依二次第：一、依隨順說法次第，如此經說；二、依隨順現觀次第，如大德說。」

脅尊者言：「此經不說三無漏根，但說菩薩菩提樹下欲界聞、思所成慧力修行四諦。」
問：世尊既說：「我由此觀，證得無上正等菩提。」豈有聞、思證菩提義？
答：菩薩由此聞、思慧力伏除一切四聖諦愚，由此定當證無上覺，故說由此證得菩提。如人先時濕皮覆面，後得除去，以[(索-系+系)*爿]覆之，其障輕微，可言無障，故此非說三無漏根。

如《契經》說：「佛告苾芻：『我於四聖諦三轉十二行相，生眼、智、明、覺。』」²⁵
問：此應有十二轉四十八行相，何故但說三轉十二行相耶？
答：雖觀一一諦皆有三轉十二行相，而不過三轉十二行相，故作是說。如預流者極七反有，及七處善并二法等。

此中，眼者，謂法智忍。 智者，謂諸法智。
明者，謂諸類智忍。 覺者，謂諸類智。

復次，眼是觀見義。 智是決斷義。
明是照了義。 覺是警察義。²⁶

五、《阿毘達磨大毘婆沙論》卷182：

【發智論】云何法輪？答：八支聖道。

若兼相應、隨轉則五蘊性，此是法輪自性、是我、是物、是相、是性、是本性。已說自性，所以今當說。

問：何故名法輪？

答：此輪是法所成法為自性，故名法輪。如世間輪金等所成，金等為性名金等輪。

²⁴ 輒〔出才ノ〕：擅自。(《漢語大詞典(九)》，p.1252)

²⁵ 另參見：《轉法輪經》卷1(大正2，503b-c)；S.56-11 Vol.V, pp.421-423；《四分律》卷32(大正22，788a)；《五分律》卷15(大正22，104b-c)；《三轉法輪經》卷1(大正2，504a-b)；《雜阿含·380-388經》卷15(大正2，104b-105a)。

²⁶ (CBETA, T27, no. 1545, p. 410, c10-p. 411, a26)。

另參見《瑜伽師地論》卷95(CBETA, T30, no. 1579, p. 843, b2-c7)，其中提及：「由五種相轉法輪者，當知名為善轉法輪：一者、世尊為菩薩時，為得所得所緣境界；二者、為得所得方便；三者、證得自所應得；四者、得已，樹他相續，令他自證，深生信解；五者、令他於他所證，深生信解。……。」

此亦如是。

有說：此輪於諸法性，能簡擇、極簡擇，能覺悟、極覺悟，現觀作證，故名法輪。

有說：此輪能淨聖慧法眼，故名法輪。

有說：此輪能治非法輪，故名法輪。非法輪者，謂布刺拏等六師所轉八邪支輪。

問：何故名輪，輪是何義？

答：動轉不住義是輪義，捨此趣彼義是輪義，能伏怨敵義是輪義，由斯等義故名為輪。²⁷

六、法救造《雜阿毘曇心論》卷10〈10 擇品〉：

牟尼說見道，疾故名法輪，或說學八支，轉至於他心。²⁸

拾、人間教化

一、遊行人間、度化眾生

1、《增壹阿含·5經》卷14〈24 高幢品〉：

爾時，世尊告五比丘：汝等盡共人間乞食，慎莫獨行。²⁹

2、《雜阿含·1096經》卷39：

世尊告諸比丘：「我已解脫人天繩索，汝等亦復解脫人天繩索。汝等當（遊）行人

²⁷ (CBETA, T27, no. 1545, p. 911, b17-29)

²⁸ (CBETA, T28, no. 1552, p. 950, b9-10)

印順導師著《以佛法研究佛法》(p.123-124)：「佛說法而阿若憍陳如悟入了，諸天稱譽為「轉法輪」；法為什麼比喻為輪，而形容為如輪的轉動呢？這是值得思考的事！《雜阿毘曇心論》（卷一〇），擇取《大毘婆沙論》（卷一八二）的要義說：「牟尼說見道，疾故名法輪。或說學八支，轉至於他心」。見道是最初悟入，是非常迅疾的（後代禪者，稱為直入、頓入）。妙音解說為「轉至於他心」。本為佛陀的自證，因佛的引導，而從弟子心中頓然顯現，被形容為「如新氈易染」。那時，「遠塵離垢，得法眼淨」，正是慧光朗徹的現覺（我從禪宗東山門下的「以心傳心」，而理會轉法輪的本義）。聖道的悟入，佛沒有闡述（所邊）悟的是什麼，而約（能邊）智慧現前說。「得法眼淨」，《轉法輪經》更廣說為「生眼、（生）智、（生）明、（生）覺」。以慧為主的現證內容，稱之為「法」，譬喻為輪那樣的迅疾，轉至於他心，是極為明確的。」

²⁹ (CBETA, T02, no. 125, p. 619, b25-26)

間，多所過度，多所饒益，安樂人天，不須伴行，一一而去。」³⁰

3、《中阿含·121 請請經》卷29〈1 小品〉：

〔*世尊：〕舍梨子！我所轉法輪，汝復能轉。³¹

二、度化三迦葉

《增壹阿含·5 經》卷14〈24 高幢品〉：

1、世尊觀迦葉諸根純熟而往化之

然復眾生之類，諸根純熟，應得度者，我今當往優留毗村聚，在彼說法。爾時，世尊便往至優留毗村聚所。爾時，連若³²河側有迦葉在彼止住，知天文、地理，靡不貫博，算數樹葉皆悉了知，將五百弟子，日日教化。³³

2、世尊以慈三昧降伏惡龍

去迦葉不遠有石室，於石室中有毒龍在彼止住。

爾時，世尊至迦葉所，到已語迦葉言：「吾欲寄在石室中一宿，若見聽者，當往止住。」

迦葉報曰：「我不愛惜，但彼有毒龍，恐相傷害耳。」

世尊告曰：「迦葉！無苦，龍不害吾，但見聽許止住一宿。」

迦葉報曰：「若欲住者，隨意往住。」

…是時，毒龍見世尊坐便吐火毒。爾時，世尊入慈三昧，從慈三昧起，入焰光三昧。爾時，龍火、佛光一時俱作。

爾時，迦葉夜起…見石室中有大火光，見已便告弟子曰：「此瞿曇沙門容貌端政，今為龍所害甚可憐愍。」我先亦有此言——彼有惡龍，不可止宿。…爾時，迦葉將五百弟子往詣石室而救此火，或持水灑者，或施梯者，而不能使火時滅，皆是如來威神所致。

爾時，世尊入慈三昧，漸使彼龍無復瞋恚。…是時，彼惡龍來向如來，入世尊鉢中住。是時，世尊以右手摩惡龍身。…彼惡龍吐舌舐如來手，熟視如來面。是時，世尊明日清旦，手擎此惡龍往詣迦葉，語迦葉曰：「此是惡龍極為兇暴，今以降之。」

爾時，迦葉見惡龍已便懷恐怖，白世尊曰：「止！止！沙門！勿復來前，龍備相害。」

世尊告曰：「迦葉！勿懼，我今已降之，終不相害。所以然者？此龍已受教化。」是時，迦葉及五百弟子歎未曾有。…雖爾，故不如我得道真。

³⁰ (CBETA, T02, no. 99, p. 288, b1-4)

³¹ (CBETA, T01, no. 26, p. 610, b9)

³² 連若=尼連【聖】(大正2, 619d, n.16)

³³ (CBETA, T02, no. 125, p. 619, b26-c2)

3、世尊雖現種種神變，然迦葉不為折伏

※至閻浮提界上，取閻浮果食

爾時，迦葉白世尊曰：「大沙門！當受我九十日請，所須衣被、飯食、床臥具、病瘦醫藥，盡當供給。」爾時，世尊默然受迦葉請。…

迦葉供辦種種飯食已，往白世尊：「飯食已辦，可往就食。」

世尊告曰：「迦葉在前，吾正爾當往。」

…是時，迦葉見世尊在石室中，白世尊曰：「沙門！為從何道來至石室？」

佛告迦葉：「汝去之後，吾至閻浮提界上，取閻浮果還來至此坐。迦葉當知！此果甚為香美可取食之。」

迦葉對曰：「我不須是，沙門自取食之。」是時，迦葉復作是念：「此沙門極有神足，有大威力，乃能至閻浮界上取此美果。雖爾，故不如我道真。」

※知迦葉心之所念，故至鬱單曰取食

…迦葉便作是念：「此沙門瞿曇，面目端政世之希有，吾明日欲大祠，國王人民盡當來集，設當見此沙門者，吾不復得供養；此沙門明日不來者，便為大幸。」

是時，世尊知迦葉心中所念，明日清旦至鬱單曰，取自然粳米；瞿耶尼取乳汁，往至阿耨達泉而食，竟日在彼住，向暮還至石室止宿。

迦葉明日至世尊所，問曰：「沙門！昨日何故不來？」

佛告迦葉：「汝昨日作是念：『此瞿曇極為端政世之希有，吾明日大祠，若國王人民見者，便斷吾供養，設不來者便是大幸。』我尋知汝心之所念，乃至鬱單曰取自然粳米，瞿耶尼取乳汁，往阿耨達泉上食，竟日在彼，向暮還至石室中止宿。」

是時，迦葉復作是念：「此大沙門，極有神足，實有威神，雖爾，故不如我得道真。」

※四天王、天帝釋及梵天王至世尊所聽經法

…即夜，四天王至世尊所而聽經法。…夜半，釋提桓因來至世尊所而聽法。…夜半，梵天王放大光明照彼山中，至世尊所而聽經法。

時，迦葉夜起見光明，明日至世尊所而問曰：「昨夜光明倍有所照，勝於日月光明，有何等因緣，致此光明？」

世尊告曰：「迦葉當知！昨夜大梵天王來至我所而聽經法。」

是時，迦葉復作是念：「此沙門瞿曇極有神力，乃能使我祖父來至此沙門所而聽經法，雖爾，故不如我得道真。」…

※世尊欲浣衣、蹋衣、曝衣，天帝釋、四天王及樹神一一滿其所願

明日清旦，迦葉至世尊所問世尊曰：「本無此池，今有此池；本無此樹，今有此樹；本無此石，今有此石。有何因緣，而有此變？」

世尊告曰：「此是昨夜天帝釋知吾欲浣衣，故作此浴池；吾復作是念：『當於何處蹋浣此衣，時四天王知吾心中所念，便持此石來。』吾復作是念：『當於何處而曝此衣，時樹神知我心中所念，便垂此樹枝耳。』」

是時，迦葉復作是念：「此沙門瞿曇雖神，故不如我得道真。」

※世尊在水上行，腳不為水所漬

是時，世尊食已還於彼宿。是時，夜半有大黑雲起而作大雨，連若大河極為瀑溢。

是時，迦葉復作是念：「此河瀑溢，沙門必當為水所漂，我今看之。」是時，迦葉及五百弟子往至河所。爾時世尊在水上行，脚不為水所漬。是時，迦葉遙見世尊在水上行。是時，迦葉便作是念：「甚奇！甚特！沙門瞿曇乃能在水上行，我亦能在水上行，但不能使脚不污耳。此沙門雖神，故不如我得道真。」

4、世尊令迦葉捨邪見之心並聽其懺悔、歸依，五百弟子亦同時歸依

世尊語迦葉言：「汝亦非阿羅漢，復不知阿羅漢道，汝尚不識阿羅漢名，況得道乎？汝是盲人，目無所覩，如來現爾許變化，故言：『不如我得道真。』汝方作是語：『吾能在水上行。』今正是時，可共在水上行耶？汝今可捨邪見之心，無令長夜受此苦惱。」

是時，迦葉聞世尊語已，便前頭面禮足：「我今悔過，深知非法，乃觸如來，唯願受悔！」如是再三。

世尊告曰：「聽汝改過，乃能自知觸擾如來。」

是時，迦葉告五百弟子曰：「汝等各隨所宜，我今自歸沙門瞿曇。」

是時，五百弟子白迦葉言：「我等先亦有心於沙門瞿曇，當降龍時，尋欲歸命。若師自歸瞿曇者，我等五百弟子盡自歸於瞿曇所。」

迦葉報言：「今正是時，然復我心執此愚癡，見爾許變化，意由³⁴不解，故自稱言：我道真正。」

是時，迦葉將五百弟子，前後圍繞，至世尊所，頭面禮足，在一面立，白世尊曰：「唯願世尊聽我等得作沙門，修清淨行！」

諸佛常法，若稱：「善來，比丘！」便成沙門。是時，世尊告迦葉曰：「善來，比丘！此法微妙，善修梵行。」是時，迦葉及五百弟子所著衣裳，盡變作袈裟，頭髮自落，如似剃髮……迦葉學術之具及於咒術，盡投水中。³⁵

5、江迦葉見兄出家，又聞佛名號，亦將三百弟子歸佛成沙門

爾時，順水下流，有梵志，名江迦葉³⁶，在水側住。是時，江迦葉見咒術之具，盡為水所漂，便作是念：「咄哉！我大兄為水所溺。」是時，江迦葉將三百弟子，順水上流，求兄屍骸。遙見世尊在一樹下坐，及大迦葉五百弟子前後圍繞而為說法。見已，便前至迦葉所，而作是語：「此事為好耶？本為人師，今為弟子。大兄何故與沙門作弟子乎？」

迦葉對曰：「此處為妙，無過此處！」

是時，優毗迦葉向江迦葉而說此偈：

「此師人天貴，我今師事之；諸佛興出世，甚為難得遇。」

是時，江迦葉聞佛名號，甚懷歡喜，踊躍不能自勝，前白世尊：「願聽為道！」

世尊告曰：「善來，比丘！善修梵行，盡於苦際。」是時，江迦葉及三百弟子即成沙門，袈裟著身，頭髮自落……。³⁷

³⁴ 由=猶【宋】【元】【明】(大正2, 621d, n.12)

³⁵ (CBETA, T02, no. 125, p. 619, c2-p. 622, a3)

³⁶ 江迦葉，或那提迦葉(Nadī-kassapa)，三迦葉之一，即優樓頻螺迦葉之弟，伽耶迦葉之兄。

³⁷ (CBETA, T02, no. 125, p. 622, a7-22)

6、伽夷迦葉見二兄已作沙門，亦將二百弟子歸佛成沙門

爾時，順水下頭有梵志，名伽夷迦葉³⁸，在水側住。遙見咒術之具，為水所漂，便作是念：「我有二兄，在上學道，今咒術之具，盡為水所漂，二大迦葉必為水所害。」即將二百弟子，順水上流，乃至學術之處，遙見二兄而作沙門，便作是語：「此處好耶？本為人尊，今為沙門弟子。」

迦葉報曰：「此處最妙，無過此處！」

是時，伽夷迦葉便作是念：「今我二兄多知博學，此處必是善地，使我二兄在中學道，我今亦可在中學道。」是時，伽夷迦葉前白今尊：「唯願世尊聽作沙門！」

世尊告曰：「善來，比丘！善修梵行，盡於苦際。」是時，伽夷迦葉即成沙門，袈裟著身，頭髮自落，如似剃頭……。³⁹

三、自利、利他、自他俱利

1、《雜阿含·349經》卷14：

如是我聞：

一時，佛住王舍城迦蘭陀竹園。

爾時，世尊告諸比丘：「善來比丘！善出家、善得己利，曠世時時得生聖處，諸根具足，不愚不癡，不須手語，好說、惡說堪能解義。我今於此世作佛——如來、應、等正覺、明行足、善逝、世間解、無上士、調御丈夫、天人師、佛世尊，說法寂滅、涅槃、菩提正向、善逝、等正覺。所謂：此有故彼有，此起故彼起，謂緣無明〔有〕行，緣行〔有〕識，乃至純大苦聚集；無明滅則行滅，乃至純大苦聚集，純大苦滅。」

諸比丘！難得之處已得，生於聖處，諸根具足，乃至純大苦聚集，純大苦滅。

是故，比丘！當如是學：『自利、利他、自他俱利。』如是出家，不愚不癡，有果有樂，有樂果報。供養衣服、飲食、臥具、湯藥者，悉得大果、大福、大利。是故，比丘！當如是學。」

佛說此經已，諸比丘聞佛所說，歡喜奉行。⁴⁰

2、《中阿含·172心經》卷45〈3心品〉：

世尊！云何聰明比丘點慧廣慧？云何施設聰明比丘點慧廣慧？

世尊聞已，歎曰：「善哉！善哉！比丘！謂有賢道而有賢觀，極妙辯才，有善思惟：『世尊！云何聰明比丘點慧廣慧？云何施設聰明比丘點慧廣慧？』比丘！所問為如是耶？」

比丘答曰：「如是，世尊！」

³⁸ 伽夷迦葉(Gayā-kassapa)，或伽耶迦葉，譯為象迦葉，三迦葉之一。

³⁹ (CBETA, T02, no. 125, p. 622, a24-b8)

⁴⁰ (CBETA, T02, no. 99, p. 98, b6-21)

世尊告曰：「若比丘不念自害，不念害他，亦不念俱害。比丘但念自饒益及饒益他，饒益多人，愍傷世間，為天、為人求義及饒益，求安隱快樂。比丘！如是聰明比丘點慧廣慧！如是如來施設聰明比丘點慧廣慧！」⁴¹

3、《中阿含·102念經》卷25〈4因品〉：

有一人來，不為彼求義及饒益、求安隱快樂者，當知是魔波旬也。……

有一人來，為彼求義及饒益、求安隱快樂者，當知是如來、無所著、等正覺也。⁴²

4、《增壹阿含·3經》卷2〈3廣演品〉：

聖眾者，所謂四雙八輩，是謂如來聖眾，應當恭敬，承事禮順。所以然者？是世福田故。於此眾中，皆同一器。亦以自度，復度他人至三乘道，如此之業，名曰聖眾。⁴³

5、《增壹阿含·5經》卷19〈27等趣四諦品〉：

(1) 如何疾成無上道

爾時，彌勒菩薩至如來所，頭面禮足，在一面坐。爾時，彌勒菩薩白世尊：「菩薩摩訶薩成就幾法，而行檀波羅蜜，具足六波羅蜜，疾成無上正真之道？」

(2) 行四法本，具六波羅蜜，能疾成無上道

佛告彌勒：「若菩薩摩訶薩行四法本，具足六波羅蜜，疾成無上正真等正覺。云何為四？

A、平等布施一切，不存凡、聖之別

於是，菩薩惠施佛、辟支佛，下及凡人，皆悉平均不選擇人，恒作斯念：『一切由食而存，無食則喪。』是謂菩薩成就此初法，具足六度。

B、布施內、外財時，歡喜惠施不生著想

復次，菩薩若惠施之時，頭、目、髓、腦，國、財、妻、子，歡喜惠施，不生著想。由如應死之人臨時還活，歡喜踊躍，不能自勝。爾時，菩薩發心喜悅，亦復如是，布施誓願不生想著。

C、不自為己而行布施

復次，彌勒！菩薩布施之時，普及一切，不自為己使成無上正真之道。是謂成就此三法，具足六度。

D、貴重菩薩

復次，彌勒！菩薩摩訶薩布施之時，作是思惟：『諸有眾生之類，菩薩最為上首，具足六度，了諸法本。』

⁴¹ (CBETA, T01, no. 26, p. 709, b27-c10)。A. IV. 186. Ummagga。

⁴² (CBETA, T01, no. 26, p. 590, a5-13)

⁴³ (CBETA, T02, no. 125, p. 554, c24-27)

何以故？食已，諸根寂靜，思惟禁戒，不興瞋恚，修行慈心，勇猛精進，增其善法，除不善法，恒若一心，意不錯亂，具足辯才，法門終不越次，使此諸施具足六度，成就檀波羅蜜。」

若菩薩摩訶薩行此四法，疾成無上正真等正覺。是故，彌勒！若菩薩摩訶薩欲施之時，當發此誓願，具足諸行。如是，彌勒！當作是學！」

爾時，彌勒聞佛所說，歡喜奉行！⁴⁴

四、回鄉與父說法，及度化釋族

《增壹阿含·5經》卷15〈24高幢品〉：

1、如來在世，應行五事

如來在世間，應行五事。云何為五？一者，當轉法輪；二者，當與父說法；三者，當與母說法；四者，當導凡夫人立菩薩行；五者，當授菩薩別。

2、念父母恩重，往共相見

真淨王〔*即淨飯王〕聞世尊已達迦毗羅衛城北薩盧園中。是時，真淨王將諸釋眾，往詣世尊所。是時，世尊復作是念：「若真淨王躬自來者，此非我宜，我今當往與共相見。所以然者？父母恩重，育養情甚。」

3、教導真淨王：當以正法治化，勿用邪法

是時，真淨王見世尊端正無比，世之希有，諸根寂靜，無眾多念，身有三十二相、八十種好，而自莊身，發歡喜之心，即便頭面禮足，而作是說：「我是剎利王種，名曰真淨王。」

世尊告曰：「令大王享壽無窮。是故，大王！當以正法治化，勿用邪法。大王當知：諸有用正法治化者，身壞命終，生善處天上。」

4、漸說妙義令王得法眼淨

世尊與真淨王漸說妙義，所謂論者：施論、戒論、生天之論，欲、不淨行，出要為樂。爾時，世尊見王心開意解，諸佛世尊常所說法：苦、集、盡、道，盡向王說。是時，真淨王即於座上，諸塵垢盡，得法眼淨。

5、授記弟子出家學道者

「汝等見此阿難釋乘白象、白衣不乎？」

諸比丘對曰：「唯然，世尊！我等見之。」

佛告比丘：「此人當出家學道，第一多聞，堪侍左右。」

「汝等見此阿那律不乎？」

諸比丘對曰：「唯然，見之。」

⁴⁴ (CBETA, T02, no. 125, p. 645, a28-b25)。彌勒菩薩是未來佛，詳細的介紹，請參見：《增壹阿含·3經》卷44〈48十不善品〉(CBETA, T02, no. 125, p. 787, c2-p. 789, c27)

佛告比丘：「此人當出家學道，天眼第一。」

爾時，世尊告諸比丘：「

第一弟子，博識多知，國王所念，所謂阿若拘鄰比丘是。

能勸化人民，優陀耶比丘是。

有速疾智，所謂摩訶男比丘是。

恆喜飛行，所謂須婆休比丘是。

空中往來，所謂婆破比丘是。

多諸弟子，所謂優毗迦葉比丘是。

意得觀空，所謂江迦葉比丘是。

意得止觀，所謂象迦葉比丘是。」⁴⁵

五、度女眾出家

《中阿含·116 瞿曇彌經》卷28〈5 林品〉：

1、大愛道三請出家，佛三止之

我聞如是：一時，佛遊釋羈瘦，在迦維羅衛尼拘類樹園，與大比丘眾俱受夏坐。

爾時，瞿曇彌大愛⁴⁶往詣佛所，稽首佛足，卻住一面，白曰：「世尊！女人可得第四沙門果耶？因此故，女人於此正法、律中，至信、捨家、無家、學道耶？」

世尊告曰：「止！止！瞿曇彌！汝莫作是念：『女人於此正法、律中，至信、捨家、無家、學道。』瞿曇彌！如是汝剃除頭髮，著袈裟衣，盡其形壽，淨修梵行。」於是，瞿曇彌大愛為佛所制，稽首佛足，繞三匝而去。

爾時，諸比丘為佛治衣，世尊不久於釋羈瘦受夏坐竟，補治衣訖，過三月已，攝衣持鉢，當遊人間。瞿曇彌大愛聞諸比丘為佛治衣，世尊不久於釋羈瘦受夏坐竟，補治衣訖，過三月已，攝衣持鉢，當遊人間。瞿曇彌大愛聞已，復詣佛所，稽首佛足，卻住一面，白曰：「世尊！女人可得第四沙門果耶？因此故，女人於此正法、律中，至信、捨家、無家、學道耶？」

世尊亦再告曰：「止！止！瞿曇彌！汝莫作是念：『女人於此正法、律中，至信、捨家、無家、學道。』瞿曇彌！如是汝剃除頭髮，著袈裟衣，盡其形壽，淨修梵行。」於是，瞿曇彌大愛再為佛所制，稽首佛足，繞三匝而去。

彼時，世尊於釋羈瘦受夏坐竟，補治衣訖，過三月已，攝衣持鉢，遊行人間。瞿曇彌大愛聞世尊於釋羈瘦受夏坐竟，補治衣訖，過三月已，攝衣持鉢，遊行人間。瞿曇彌

⁴⁵ (CBETA, T02, no. 125, p. 622, c12-624, b8)

⁴⁶ 瞿曇彌大愛(Mahāpajāpatī Gotamī)，或大愛道，為摩耶夫人之妹，撫養佛陀長大。

大愛即與舍夷⁴⁷諸老母，俱隨逐佛後，展轉往至那摩提⁴⁸，住那摩提捷尼精舍。於是，瞿曇彌大愛復詣佛所，稽首佛足，卻住一面，曰：「世尊！女人可得第四沙門果耶？因此故，女人於此正法、律中，至信、捨家、無家、學道耶？」

世尊至三告曰：「止！止！瞿曇彌！汝莫作是念：『女人於此正法、律中，至信、捨家、無家、學道。』瞿曇彌大愛！如是汝剃除頭髮，著袈裟衣，盡其形壽，淨修梵行。」於是，瞿曇彌大愛三為世尊所制，稽首佛足，繞三匝而去。

2、為報佛母深思及究竟解脫，阿難請求佛允女眾出家

彼時，瞿曇彌大愛塗跣汗足，塵土塗體，疲極悲泣，住立門外。

尊者阿難見瞿曇彌大愛塗跣汗足，塵土塗體，疲極悲泣，住立門外；見已，問曰：「瞿曇彌！以何等故，塗跣汗足，塵土塗體，疲極悲泣，住立門外？」

瞿曇彌大愛答曰：「尊者阿難！女人不得於此正法、律中，至信、捨家、無家、學道。」

尊者阿難語曰：「瞿曇彌！今且住此，我往詣佛，白如是事。」

瞿曇彌大愛白曰：「唯然！尊者阿難！」

(1) 女人出家有令梵行不得久住之過

於是，尊者阿難往詣佛所，稽首佛足，叉手向佛，白曰：「世尊！女人可得第四沙門果耶？因此故，女人得於此正法、律中，至信、捨家、無家、學道耶？」

世尊告曰：「止！止！阿難！汝莫作是念：『女人得於此正法、律中，至信、捨家、無家、學道。』阿難！若使女人得於此正法、律中，至信、捨家、無家、學道者，令此梵行便不得久住。阿難！猶如人家多女少男者，此家為得轉興盛耶？」

尊者阿難白曰：「不也，世尊！」

「如是，阿難！若使女人得於此正法、律中，至信、捨家、無家、學道者，令此梵行不得久住。阿難！猶如稻田及麥田中，有穢⁴⁹生者必壞彼田。如是，阿難！若使女人得於此正法、律中，至信、捨家、無家、學道者，令此梵行不得久住。⁵⁰」

⁴⁷ 舍夷(Sakiyānī)，釋迦族女人。

⁴⁸ 那摩提，於《瞿曇彌記果經》(大正1，856b)作「那婆提」，村名。

⁴⁹ 「穢」，巴利本作 Setatthikā，意為白菌或禾病，菌類生於植物上而使植物枯萎。

⁵⁰ 印順法師《華雨集》第三冊(p.101-102)：「女眾出家，正法減少五百年」，如看作頭陀行者大迦葉，重律行者優波離等，見到僧伽的流品漸雜，而歸咎於女眾出家，作出正法不久住的預想，是近情的。律師們卻傳說為釋尊的預記，因而陷於傳說的極端混亂。根據經律，現有三項不同的敘述：

一、阿難一再請求，佛允許了！阿難轉告瞿曇彌，女眾出家已成定局。那時，佛才預記女眾出家，正法減損五百年。阿難聽了，沒有任何反應。這是南傳的《銅鑠律》，與《中部》的《瞿曇彌經》所說。

二、所說與上面一樣，但末後阿難聽了：「悲恨流淚，白佛言：世尊！我先不聞不知此法，求聽女人出家受具足戒，若我先知，豈當三請？」這是《五分律》說的。

阿難聽了而沒有反應，是不近情的。如照《五分律》所說，那在結集法會上，早就該痛哭認罪了，為什麼不見罪呢？

三、阿難請佛，佛就告訴他，女人出家，正法不久，並為說二喻。但阿難不管這些，繼續請

(2) 瞿曇彌與世尊曾互為饒益

尊者阿難復白曰：「世尊！瞿曇彌大愛為世尊多所饒益。所以者何？世尊母亡後，瞿曇彌大愛鞠養世尊。」

世尊告曰：「如是，阿難！如是，阿難！瞿曇彌大愛多饒益我，謂母亡後，鞠養於我。阿難！我亦多饒益於瞿曇彌大愛。所以者何？

阿難！瞿曇彌大愛因我故，得歸佛、歸法、歸比丘僧，不疑三尊及苦、集、滅、道，成就於信，奉持禁戒，修學博聞，成就布施，而得智慧；離殺、斷殺，離不與取、斷不與取，離邪淫、斷邪淫，離妄言、斷妄言，離酒、斷酒。

阿難！若使有人因人故，得歸佛、歸法、歸比丘僧，不疑三尊及苦、集、滅、道，成就於信，奉持禁戒，修學博聞，成就布施，而得智慧；離殺、斷殺，離不與取、斷不與取，離邪淫、斷邪淫，離妄言、斷妄言，離酒、斷酒。阿難！設使此人為供養彼人衣被、飲食、臥具、湯藥、諸生活具，至盡形壽，不得報恩。

3、佛允女眾出家乃制八尊師法

阿難！我今為女人施設八尊師法，謂女人不當犯，女人奉持，盡其形壽。阿難！猶如魚師及魚師弟子，深水作塢，為守護水，不令流出。如是，阿難！我今為女人說八尊師法，謂女人不當犯，女人奉持，盡其形壽。云何為八？

阿難！比丘尼當從比丘求受具足。阿難！我為女人施設此第一尊師法，謂女人不當犯，女人奉持，盡其形壽。

阿難！比丘尼半月半月往從比丘受教。阿難！我為女人施設此第二尊師法…。

阿難！若住止處設無比丘者，比丘尼便不得受夏坐。阿難！我為女人施設此第三尊師法…。

阿難！比丘尼受夏坐訖，於兩部眾中，當請三事：求見、聞、疑。阿難！我為女人施設此第四尊師法…。

阿難！若比丘不聽比丘尼問者，比丘尼則不得問比丘經、律、阿毘曇；若聽問者，比丘尼得問經、律、阿毘曇。阿難！我為女人施設此第五尊師法…。

阿難！比丘尼不得說比丘所犯，比丘得說比丘尼所犯。阿難！我為女人施設此第六尊師法…。

阿難！比丘尼若犯僧伽婆尸沙⁵¹，當於兩部眾中，十五日行不慢⁵²。阿難！我為女人施設此第七尊師法…。⁵³

求，佛才准許了。這是《四分律》，《中阿含·瞿曇彌經》說的。

以常情論，如明知這樣，還是非請求不可，這還像敬佛敬法，多聞敏悟的阿難嗎？老實說，在請度女人時，如釋尊早就預記，無論說在什麼時候，都與情理不合。也就由於這樣，律師們將預記放在那一階段都不合，然而非放進去不可。於是或前或後，自相矛盾！」

⁵¹ 僧伽婆尸沙(Savghādisesa)，或稱僧殘，大戒中僅次於四波羅夷罪。

⁵² 十五日行不慢，即 pakkhamānattam caritabbam (行半月摩那埵)，指犯重罪者必須在比丘、比丘尼兩部眾之間接受半月的摩那埵(Mānatta)，即於大眾面前告白懺悔之治罪法。

⁵³ A. vol. 4, (p.277)之第七法作：「無論何等事情，比丘尼不得罵詈讒謗比丘。」

阿難！比丘尼受具足雖至百歲，故當向始受具足比丘極下意稽首作禮，恭敬承事，又手問訊。阿難！我為女人施設此八尊師法，謂女人不當犯，女人奉持，盡其形壽。

阿難！若瞿曇彌大愛奉持此八尊師法者，是此正法、律中，出家學道，得受具足，作比丘尼。」⁵⁴

於是，尊者阿難聞佛所說，善受善持，稽首佛足，繞三匝而去。往詣瞿曇彌大愛所，語曰：「瞿曇彌！女人得於此正法、律中，至信、捨家、出家、學道。瞿曇彌大愛！世尊為女人施設此八尊師法，謂女人不當犯，女人奉持，盡其形壽。……

如是尊者阿難！世尊為女人施設此八尊師法，我盡形壽頂受奉持！」爾時，瞿曇彌大愛於正法、律中，出家學道，得受具足，作比丘尼。⁵⁵

六、提婆達多害佛

1、《別譯雜阿含·3經》卷1：

(1) 提婆達多為貪著利養而取悅於阿闍世王

如是我聞，一時佛住王舍城迦蘭陀竹林。

爾時，提婆達多獲得四禪而作是念：「此摩竭提國，誰為最勝？」覆自思惟：「今日太子阿闍世者當紹王位，我今若得調伏彼者，則能控御一國人民。」時提婆達多作是念已，即往詣阿闍世所，化作象寶從門而入，非門而出；又化作馬寶，亦復如是；又復化作沙門從門而入，飛虛而出；又化作小兒，眾寶瓔珞莊嚴其身，在阿闍世膝上。時阿闍世抱取嗚啞，唾其口中，提婆達多貪利養故，即嚙其唾；提婆達多變小兒形，還伏本身。

時阿闍世見是事已，即生邪見，謂提婆達多神通變化，踰於世尊。時阿闍世於提婆達多所，深生敬信，日送五百車食而以與之。提婆達多與其徒眾五百人，俱共受其供。

(2) 佛說提婆達多必受利養之所傷害

時有眾多比丘，著衣持鉢，入城乞食，飲食已訖往詣佛所白佛言：「世尊！向以時到入城乞食，見提婆達多招集遠近，大獲供養。」

佛告諸比丘：「汝等不應於提婆達多所生願羨心。所以者何？此提婆達多必為利養之所傷害。譬如芭蕉生實則死，蘆竹駟驢騾懷妊等，亦復如是。提婆達多得於利養，如彼無異。提婆達多愚癡無智，不識義理長夜受苦，是故汝等，若見於彼提婆達多為於利養之所危害，宜應捨棄貪求之事，審諦觀察，當作是解莫貪利養。」

即說偈言：

芭蕉生實死，蘆竹葦亦然；貪利者如是，必能自傷損。

而此利養者，當為衰損減；癡愚為利養，能害於淨善。

⁵⁴ 關於「八尊師法」，詳見印順法師《原始佛教聖典之集成》〈第二項、八敬法〉(p.401-410)。

⁵⁵ (CBETA, T01, no. 26, p. 605, a8-p. 606, c24)

譬如多羅樹，斬則更不生。⁵⁶

2、《鼻奈耶》卷2：

※調達向佛索眾，而佛不與

調達將從五人——瞿婆離、騫陀羅婆婆、迦留陀帶、三文陀羅[口+系]頭。世尊遙見調達將從五人來，世尊顧語：「目捷連！止！止！護口不須作是語，此癡人來當自有言。」

時目捷連便作是念：「我今入三昧正受，於此間坐，使調達不見我。」

時調達來至佛所，頭面禮足在一面坐，白世尊言：「今世尊老大氣力微弱，年已時過。善哉，世尊！勅諸眾僧受我供養。」

世尊答曰：「如舍利弗、目捷連等大神足人，來索眾僧，吾尚不與，況汝在懷抱受他唾哺，當與眾僧！」

時調達便興此念：「云何世尊獨歎舍利弗、目捷連，而闕絕⁵⁷我德？」時調達便起惡意，向佛及舍利弗、目捷連不辭，即從坐起去。⁵⁸

3、《增壹阿含·5經》卷9〈18 慚愧品〉：

(1) 提婆達兜教唆阿闍世王釋放醉象害佛

聞如是：

一時，佛在羅閱城迦蘭陀竹園所，與大比丘眾五百人俱。

爾時，王阿闍世有象，名那羅祇梨，極為兇弊暴虐，勇健能降外怨，緣彼象力，使摩竭一國，無不靡伏。

爾時，提婆達兜便往至王阿闍世所，到已，而作是說：「大王當知！今此象惡，能降伏眾怨，可以醇酒，飲彼象醉。清旦，沙門瞿曇必來入城乞食，當放此醉象，蹋踏殺之。」

時，王阿闍世聞提婆達兜教，即告令國中：「明日清旦，當放醉象，勿令人民在里巷遊行。」

是時，提婆達兜告王阿闍世曰：「若彼沙門瞿曇有一切智，知當來事者，明日必不入城乞食。」

王阿闍世曰：「亦如尊教，設有一切智者，明日清旦不入城乞食。」

(2) 羅閱城內人民勸阻世尊入城

爾時，羅閱城內男女大小事佛之者，聞王阿闍世清旦當放醉象害於如來，聞已，各懷愁憂，便往至世尊所，頭面禮足，在一面住。白世尊曰：「明日清旦，願世尊勿復入

⁵⁶ (CBETA, T02, no. 100, p. 374, b9-c9)

⁵⁷ 闕絕：阻斷；杜絕。(《漢語大詞典(十二)》p.127)

⁵⁸ (CBETA, T24, no. 1464, p. 860, a3-15)

城！所以然者？王阿闍世今有教令，勅語城內人民之類：『明日勿復在里巷行來，吾欲放醉象，害沙門瞿曇。設沙門有一切智，明日清旦不入城乞食。』唯願世尊勿復入城！傷害如來，世人喪目，無復救護。」

世尊告曰：「止！止！諸優婆塞！勿懷愁惱。所以然者？如來之身非俗數身，然不為他人所害，終無此事。…正使此四天下醉象滿其中，如似稻、麻、叢林，其數如是，猶不能得動如來毫毛，況復得害於如來？終無此事！…所以然者？如來神力不可思議，如來出世，終不為人所傷害也。汝等各歸所在，如來自當知此變趣。」

爾時，世尊與四部眾廣為說微妙之法。時，優婆塞、優婆斯〔*夷〕聞正法已，各從坐起，頭面禮足，便退而去。

(3) 諸天、鬼王等欲觀世尊降象

爾時，世尊清旦著衣持鉢，欲入羅閱城乞食。是時，提頭賴吒天王將乾沓怛等，從東方來，侍從世尊。是時，毘留勒⁵⁹王將拘槃荼⁶⁰眾，侍從如來。西方毘留波又將諸龍眾，侍從如來。北方天王拘毘羅⁶¹將羅剎鬼眾，侍從如來。是時，釋提桓因將諸天人數千萬眾，從兜術天沒，來至世尊所。時，梵天王將諸梵天數千萬眾，從梵天上來至世尊所。釋、梵、四天王及二十八天，大鬼神王各各相謂言：「我等今日當觀二神，龍象共鬪，誰者勝負？」

(4) 阿闍世王勅象師放醉象

時，羅閱城四部之眾遙見世尊將諸比丘入城乞食，時城內人民皆舉聲喚曰。王阿闍世復聞此聲，問左右曰：「此是何等聲響，乃徹此間？」

侍臣對曰：「此是如來入城乞食，人民見已，故有此聲。」

阿闍世曰：「沙門瞿曇亦無聖道，不知人心來變之驗。」王阿闍世即勅象師：「汝速將象飲以醇酒，鼻帶利劍，即放使走！」

(5) 世尊降伏醉象令得調伏

爾時，世尊將諸比丘詣城門，適舉足入門。時，天地大動，諸神尊天在虛空中散種種之華。時，五百比丘見醉象來，各各馳走，莫知所如。時，彼暴象遙見如來，便走趣向。侍者阿難見醉象來，在世尊後，不自安處，白世尊曰：「此象暴惡，將恐相害，宜可遠之。」

世尊告曰：「勿懼！阿難！吾今當以如來神手降伏此象。」

如來觀察暴象不近不遠，便化左右作諸師子王，於彼象後作大火坑。時，彼暴象見左右師子王及見火坑，即失尿放糞，無走突處，便前進向如來。爾時，世尊便說此偈：「汝莫害於龍，龍現甚難遇；不由害龍已，而得生善處。」

爾時，暴象聞世尊說此偈，如被火燃，即自解劍，向如來跪雙膝，投地以鼻舐如來

⁵⁹ 毗留勒叉(virūha)，或毗樓勒，即四天王之南方增長天，居於須彌山半腹之南面。

⁶⁰ 拘槃荼(Kumbhaṇḍa)，夜叉名，譯為陰囊、甕形，此鬼嗜食人之精氣。

⁶¹ 拘毗羅(Kudera)，毗沙門天之別名。

足。時，世尊伸右手摩象頭，而作是說：「瞋恚生地獄，亦作蛇蚺⁶²形；是故當捨恚，更莫受此身。」

爾時，神尊諸天在虛空中，以若干百千種花散如來上。是時，世尊與四部之眾、天、龍、鬼神說微妙法。爾時，見降象男女六萬餘人諸塵垢盡，得法眼淨，八萬天人亦得法眼淨。時，彼醉象身中刀風⁶³起，身壞命終，生四天王宮。⁶⁴

⁶² 蚺〔ㄌㄢˇ〕：指蝮蛇*或蜥蜴一類的動物。

蚺〔ㄨㄢˇ〕：蝮蛇之屬。也稱虺。((《漢語大詞典(八)》p.865)

※蝮蛇〔ㄉㄨˋㄨㄢˇ，ㄌㄢˇ〕：兩栖動物。狀如蜥蜴，頭扁，背黑色，腹紅黃色，有黑斑，四肢短，尾側扁，生活在水中。((《漢語大詞典(八)》p.990)

⁶³ (1)《佛說五王經》卷1(大正14, 796c2):「欲死之時，刀風解形，無處不痛。」

(2)《正法念處經》卷66〈7身念處品〉(大正17, 392c11-12):「見命終時刀風皆動，皮肉筋骨脂髓精血一切解截。」

⁶⁴ (CBETA, T02, no. 125, p. 590, a8-p. 591, a6)